

PRIRUČNIK ZA NOVINARE

ISTRAŽIVANJE IMOVINE ZVANIČNIKA



CENTAR ZA ISTRAŽIVAČKO NOVINARSTVO (CIN)

maj 2021.

► UVOD

Novinari Centra za istraživačko novinarstvo (CIN) iz Sarajeva duže od decenije istražuju i prikupljaju podatke o imovini političara i funkcionera u Bosni i Hercegovini (BiH). Ova istraživanja često rezultiraju konkretnim pričama. Također, sve prikupljene informacije CIN objavljuje u online bazi „Imovina političara“ koja je najpotpunija baza o prihodima, pokretnoj i nepokretnoj imovini osoba na odgovornim funkcijama koji dolaze iz vladajućih i opozicionih stranaka u BiH.

CIN je prvu ovakvu bazu objavio 2009. godine kada je obradio podatke o imovini 32 političara, a do 2014. godine taj broj u bazi je porastao na 200.

Pored toga što građanima nudi brz, besplatan i opsežan uvid u imovinsko stanje izabranih zvaničnika jer su plaćeni javnim novcem, ova baza je postala vrijedna građa za buduće novinarske tekstove ne samo novinara CIN-a nego i kolega iz drugih redakcija.

CIN je tim tragom tokom proteklih godina objavio brojna istraživanja o nezakonitom sticanju imovine funkcionera i političara, manipulacijama prilikom trgovine nekretninama ili prikrivanju vlasništva. Novinari su otkrivali nesrazmjer između novca koji su političari ulagali u nekretnine i njihovih legalnih prihoda te tako dokazivali stečenu imovinsku korist i njihovu umješanost u korupciju i kriminalne radnje. Nakon objava ovakvih priča, koje su dokazivane isključivo na osnovu zvaničnih dokumenata, reagovala su istražne institucije. Protiv nekih političara su pokrenuti sudski procesi, podizane optužnice te im je odlukom suda blokirana imovina, dok su drugi zbog pritiska javnosti smijenjeni sa pozicija.

U ovom priručniku možete pronaći metodologiju novinarskog istraživanja imovine političara i svojevrsni rječnik osnovnih termina na koje možete naići tokom rada. Ovaj proces nije nimalo lagan. Konačni rezultati rada zavise od upornosti, znanja i snalaženja novinara te razumijevanja urednika za vrijeme i novac koje će biti potrošeni na istraživanje sa neizvjesnim ishodom.

PREDISTRAŽIVANJE

Do subjekta istraživanja možete doći na više načina: na osnovu prijave građana, novinarskog izvora ali i instinkta novinara da je neka osoba vrijedna istraživanja. Kada ukrstite i propitate razloge osnovanosti istraživanja nečije imovine (npr. da li neko obavlja dovoljno važnu funkciju, donosi odluke u ime građana pa im je i odgovoran), odlučujete ko je subjekt i počinjete istraživati.

Prvi korak je predistraživanje. Prvo je potrebno provjeriti sve već poznate i objavljene podatke o subjektu kako biste saznali lokacije za potencijalne nekretnine u vlasništvu osobe od interesa.

Dakle – na osnovu nekoliko provjerenih činjenica ćete pretpostaviti druge, kako biste ih što prije i što efikasnije potvrdili ili odbacili. Svaka informacija je dobrodošla tako da vas u ovom momentu ne treba brinuti je li podatak do kojeg ste došli tačan jer ćete ga svakako utvrditi tokom istraživanja. To podrazumijeva detaljan press clipping kako biste saznali šta su drugi mediji već objavili o istoj temi. Od posebne važnosti su komentari koje čitatelji ostavljaju ispod tekstova, pa i na njih obratite pažnju.

Drugi izvor su formalni i neformalni razgovori sa osobama koje su na bilo koji način povezane sa subjektom istraživanja. To mogu biti: stranačke kolege, poznanici, komšije, porodica, prijatelji, radne kolege ili bilo ko sa više informacija koje vas interesuju.

Ukoliko je subjekat vašeg istraživanja prethodno bio kandidat na izborima, tražite od Centralne izborne komisije BiH (CIK) imovinske kartone koje je popunio prilikom kandidature ili nakon imenovanja. U ovim obrascima, osim podataka o imovini, možete pronaći i imena članova porodice koji će vam kasnije biti korisni za istraživanje.

Ukoliko je dostupna, zvanična biografija vam također može koristiti. Ljudi tokom života zbog poslovnih obaveza i privatnih odluka žive na različitim mjestima, pa morate pretpostaviti da bi u svakom od njih mogli imati nekretnine, uključujući i mjesto u kojem su se rodili.

METODOLOGIJA

Po završetku predistraživanja pred sobom ćete imati spisak gradova u kojima ćete tražiti nekretnine osoba koje ste odabrali za istraživanje. Za ove podatke obraćate se općinskim sudovima tj. zemljišnoknjižnim uredima u Federaciji BiH i republičkim upravama za geodetske i imovinsko-pravne poslove u Republici Srpskoj (RS).

Treba napomenuti da su, prema važećim zakonima, zemljišne knjige javne i pri traženju ovih dokumenata nema potrebe da se pozivate na zakone o slobodnom pristupu informacijama.

Vaš zahtjev ovim institucijama treba da sadrži najmanje ime i prezime te ime oca vašeg subjekta istraživanja. Međutim, praksa sudova u BiH je različita pa ćete doći u situaciju da će od vas tražiti i datum rođenja, a u nekim slučajevima i matični broj. Do ovih podataka je teško doći, pa stoga morate uložiti dodatni napor kako biste kompletirali svoj zahtjev.

Zemljišnoknjižni uredi skoro u pravilu odgovaraju u roku od 15 dana. Oni će vam dostaviti zemljišnoknjižne (ZK) izvode koji će biti dokaz da je vaš subjekat vlasnik neke nekretnine. Važno je napomenuti da ste za svaki izvod dužni platiti sudsku taksu od 5 KM do 15 KM, ovisno o sudu kojem ste se obratili.



BOSNA I HERCEGOVINA
FEDERACIJA BOSNE I HERCEGOVINE
Općinski sud u Sarajevu
ZEMLJIŠNOKNJIŽNI URED
02.11.2020 09:05

Katastarska općina: SP_KIJEVO

BROJ: 066-0-NAR-30-077 111
Zemljišnoknjižni uložak broj: 1235

Zemljišnoknjižni izvadak

A Popisni list

R.br.	Broj parcele	OZNAKA NEKRETNINA	Površina			Primjedba
			ha	a	m ²	
1.	1821/474	ŠUMA; ŠUMA 0000 07 32	0000	07	32	Vidi A2 rbr. 1


B Vlasnički list

R.br.	UPISI	Primjedba
2.	Udio: 1/1 Marko (Pero) Marković JMBG: 1508978443211 Pr. 21.07.2020. godine 066-0-DN-30-018 123 Na osnovu otpravka originala Ugovora o kupoprodaji, zaključenog dana 06.07.2020. godine, broj: OPU - 719/20, obrađenog od strane Alić Aida, notara iz Pala, uknjiženo je pravo vlasništva na nekretnine u A listu. Provedeno dana 18.08.2020. godine S.B. Tip: Vlasništvo Adresa: Klek broj 1, Istočno Novo Sarajevo	

C Teretni list

R.br.	UPISI	Iznos (KM)	Primjedba
1.	Nema tereta		

Potpis zemljišno



[Handwritten signature]



U ZK izvodu najčešće možete pronaći ime i prezime i ime oca vlasnika, lokaciju nekretnine, osnov i vrijeme sticanja nekretnine.

Iako ste ovim dokumentom potvrdili da je neko vlasnik, istraživanje tek počinje. Za nastavak rada trebate doći do dokumenata koji dokazuju osnov sticanja, koji može biti:

- **Kupoprodajni ugovor**
- **Rješenje o nasljedstvu**
- **Ugovor o poklonu**
- **Sudska presuda**
- **Ugovor o zamjeni**
- **Ugovor o diobi**

Sad se pripremate za slanje novog zahtjeva istim institucijama od kojih ćete tražiti navedene dokumente. Ovaj put je forma zahtjeva drugačija. Ukoliko je vaš subjekat istraživanja postao vlasnik nekretnine na osnovu kupoprodajnog ugovora ili rješenja o nasljedstvu u zahtjev unosite podatke iz ZK izvoda koji se nalazi u „B vlasničkom listu“.

Pr.18.02.2014.g. 059-0-Dn-12-000 318

Na osnovu Otprevka izvornika ugovora u kupoprodaji nekretnine OPU-IP 453/2012 od 16.05.2012. uknjižuje se pravo vlasništva na nekretninama u A listu.

Pr.06.11.1986. Dn.1963/86

Na osnovu pravomoćnog rješenja o nasljeđivanju Opštinskog suda u Mostaru O 663/83 od 08.05.1986. uknjiženo je pravo vlasništva na nekretninama u A listu.

Dakle, u zahtjevu ćete navesti broj DN-a (dnevnika) i osnov sticanja kako biste dobili taj dokument. Ukoliko je vlasnik nekretninu stekao na osnovu ugovora o poklonu, sudske presude, ugovora o zamjeni ili diobe nekretnina morat ćete tražiti historiju ZK izvoda. A evo i zašto.

Moguće je da vaš subjekat istraživanja poklonom, zamjenom ili diobom nekretnina sa bliskim osobama želi da prikrije način sticanja nekretnine. Naime, u svakom ZK izvodu je upisana posljednja radnja vezana za tu nekretninu. Npr. ukoliko je vaš subjekat poklonio nekretninu članu porodice u ZK izvodu ćete vidjeti samo broj ugovora o poklonu, ali nećete znati ko mu je poklonio i kako je poklonodavac stekao nekretninu. U ovim slučajevima od institucija ćete tražiti već pomenutu historiju ZK izvoda u kojem će stajati broj DN-a i raniji osnov sticanja nekretnine te ime poklonodavca. Tek kad dobijete takav ZK izvod - pišete novi zahtjev.

Slično je i kada je vlasnik nekretnine postao vlasnik na osnovu presude. Na taj način ćete utvrditi kako i zašto je došlo do presude.

OPU- IP 545 /2009

uknjiženo je pravo vlasništva u korist: Hadžić (Emir) Amina; JMBG: 240376178528 sa dijelom 1/1 -----
 2. Lične karte Prodavca, saglasnog supruga Prodavca i Kupca na osnovu kojih je notar utvrdio identitet stranaka kao fizičkih lica -----
 Notar upozorava stranke da Prodavac nije dostavila potvrde o izmirenim komunalnim uslugama, te upozorava Kupca na rizik kupovine predmetne nekretnine zbog eventualnih neizmirenih obaveza, ali Kupac izjavi da se nalazi u posjedu stana još od decembra 2008. godine, te da je lično preuzela plaćanje komunalnih obaveza. -----

Nakon što je notar utvrdio da su stranke sposobne i ovlaštene za zaključivanje ovog pravnog posla, poučio ih o pravnom dometu posla, te nakon što su izjavile da su razumjele smisao pravnog posla i da Prodavac i Kupac imaju ozbiljnu i pravu volju za sklapanje istog za ovu notarsku ispravu izjavili su sljedeći: -----

UGOVOR O KUPOPRODAJI STANA

I PREDMET PRODAJE

Član 1.

1.1. Prodavac prodaje, a Kupac kupuje u vlasništvo sa dijelom 1/1 nekretninu označenu kao broj poduloška 9971/1, dvosoban stan koji se nalazi u Sarajevu, ulica Maršala Tita br. 1, sprat 2, oznaka 11, a sastoji se od 2 sobe, kuhinje i pomoćnih prostorija ukupne površine 47 m², i dio zajedničkih prostorija i uređaja koji pripadaju stanu i zgradi kao cjelini i zemljište ispod zgrade, upisan u Izvadak iz knjige položenih ugovora Općinskog suda u Sarajevu, br. zk poduloška: 9971, općina KPU Centar. -----

1.2. Prodavac je saglasan da Kupac po osnovu ovog ugovora može na svoje ime prenijeti sve priključke komunalne infrastrukture koji postoje na predmetnom stanu (telefonski, elektropriključak, vodovodni, kanalizacioni, toplane i dr.) -----

II CIJENA I NAČIN PLAĆANJA CIJENE

Član 2.

- 2.1. Prodavac i Kupac su na ime prodaje nekretnine iz člana 1. ovog ugovora ugovorili ukupnu kupoprodajnu cijenu u iznosu od 125.000,00 KM (slovima: stotinuvadesetpethiljada i 0/00 konvertibilnihmaraka) koju će Kupac isplatiti Prodavcu na sljedeći način: -----
 - iznos u visini od 58.000,00 KM (slovima: pedesetosamhiljada i 0/00 konvertibilnihmaraka) kupac je isplatio Prodavcu prije zaključivanja ovog ugovora, što Prodavac potvrđuje svojim potpisom na ovom ugovoru da je primila dio ugovorene kupoprodajne cijene u iznosu od 58.000,00 KM (slovima: pedesetosamhiljada i 0/00 konvertibilnihmaraka) -----
- 2.2. Preostali dio cijene u iznosu od 67.000,00 (slovima: Šezdesetsedamhiljada konvertibilnih maraka) Kupac će isplatiti Prodavcu iz kredita koji će realizirati kod UniCredit Bank d.d. u roku od 15 dana od dana zaključivanja ovog ugovora.
- 2.3. Prodavac je saglasan da se na nekretnini iz člana 1. ovog ugovora zasnjuje hipoteka u korist banke radi obezbjeđenja kredita koji će odobriti Kupcu, a sve u cilju isplate ugovorene kupoprodajne cijene -----
- 2.4. U slučaju da Kupac ne isplati ostatak ugovorene kupoprodajne cijene iz stava 2.1. ovog člana u visini od 67.000,00 KM, ugovorne strane su saglasne da se ovaj ugovor ima smatrati raskinutim i isti neće proizvoditi pravno dejstvo, te se Prodavac obavezuje u slučaju raskida istog isplaćeni iznos u visini od 58.000,00 KM (slovima: pedesetosamhiljada i 0/00 konvertibilnihmaraka) vratiti Kupcu. -----
- 2.5. Notar upozorava stranke da neće izdavati opravke ovog izvornika sve dok se ne dostave dokaz o izmirenoj kupoprodajnoj cijeni, osim prepisa (bez clausule intabulandi) za banku radi realizacije kredita i isplate kupoprodajne cijene -----

ANALIZA DOKUMENATA I PRIMJERI

U svim ovim dokumentima ćete pronaći važne informacije koje su vam potrebne za nastavak istraživanja: detaljne podatke o nekretnini, prodavcu, kupcu, poklonoprimcu, poklonodavcu, vrijeme trgovine nekretninom, cijenu, podatak o hipoteki, podatke o kreditima i ostale specifičnosti o poslovnim i privatnim odnosima subjekta istraživanja, koje nećete moći pronaći nigdje drugdje.

U sljedećim primjerima iz CIN-ovih priča pogledajte šta možete pronaći kada prikupite sve dokumente.

► **Imovina Kemala Čauševića, bivšeg direktora Uprave za indirektno oporezivanje (UIO)**

Čaušević je od 2006. do kraja 2012. godine kupio pet stanova, četiri poslovna prostora i više od 20.000 kvadratnih metara zemljišta. Nekretnine se nalaze u najužem centru Sarajeva i na drugim lokacijama u gradu. **Platio ih je milion i 80 hiljada KM.**

► **Imovina Farisa Gavrankapetanovića, bivšeg direktora Kliničkog centra Univerziteta u Sarajevu (KCUS)**

Gavrankapetanović i članovi njegove porodice su od 2005. do 2012. godine kupili najveći broj nekretnina: četiri stana, poslovni prostor, devet garaža i 4.000 kvadratnih metara zemljišta. Nekretnine se nalaze u Sarajevu i Počitelju. **Platio ih je milion i 867 hiljada KM.**

Dakle, analiza prikupljenih dokumenata u ovim primjerima je pokazala da su Čaušević i Gavrankapetanović sa svojom porodicom uložili veliki novac u kupovinu nekretnina. To samo po sebi može biti interesantno, ali je nedovoljno za jaku tezu u istraživačkoj priči.

Da biste to dobili, morate utvrditi sve okolnosti u vrijeme kupovine - da li su za to imali novca i kako su ga zaradili – kako biste utvrdili eventualni nesrazmjer između novca koji su subjekti istraživanja uložili u kupovinu nekretnina i njihovih primanja u istom periodu.

Da biste ovo utvrdili važno je da prikupite podatke o karijeri subjekta istraživanja – gdje je radio, koje poslove je obavljao te da li je (su)vlasnik profitabilne firme. Nakon toga morate saznati koliko je u određenom periodu zarađivao na tim pozicijama. Da bi vaše istraživanje bilo fer i u skladu sa standardima novinarske profesije morate se potruditi doći i do njihovih dodatnih primanja, a to mogu biti prihodi od: iznajmljivanja nekretnina, honorarnih poslova, autorskog rada, prodaje dionica, prihoda od firmi...

Do ovih podataka nije lako doći. Jednim dijelom ih možete prikupiti od institucija u kojima su radili (posebno ako je riječ o javnim institucijama i ustanovama) a dijelom od svojih izvora na važnim pozicijama, koji su jako važni za realizaciju ovakve priče.

Kada saznate kolika primanja je ostvario subjekt istraživanja u vrijeme (i uoči) kupovine nekretnina - tek tada imate tezu i lid istraživačke priče.

U slučaju Čauševića i Gavrankapetanovića to izgleda ovako:

KEMAL ČAUŠEVIĆ

Vrijednost nekretnina:

1.080.000 KM

Ukupna primanja:

629.000 KMPeriod: **2004 – 2012**Sporna razlika: **451.000 KM****FARIS GAVRANKAPETANOVIĆ**

Vrijednost nekretnina:

1.867.000 KM

Ukupna primanja:

1.410.000 KMPeriod: **2005 – 2012**Sporna razlika: **457.000 KM**

U ovakvim analizama je važno uzeti u obzir da su subjekti istraživanja i njihove porodice morali imati i dodatne troškove pri kupovini nekretnina: plaćanje poreza na nekretnine, adaptacije i opremanje stanova i poslovnih prostora, a posebnu i veliku stavku izdataka čine i redovni životni troškovi.

Dakle, njihova ionako slaba platežna moć se ubranjem tih troškova značajno smanjuje. Ovim postaje jasno da njihovi ukupni ostvareni prihodi nisu bili ni približno dovoljni da pokriju ulaganja u imovinu. Ovakav način dokazivanja vlasništva i načina sticanja imovine je važan i pri otkrivanju tačnosti podataka koje političari upisuju u svoje imovinske kartone.

Prema Izbornom zakonu BiH, kandidati i izabrani zvaničnici su obavezni CIK-u prijaviti prihode iz prethodne godine te svoju i imovinu članova uže porodice, koja je vrednija od 5.000 KM. Važno je napomenuti da CIK ne provjerava sadržaj imovinskih kartona niti je predviđena sankcija za nepotpuno ili lažno prijavljivanje imovine.

Zbog toga ovakva novinarska istraživanja imaju dodatnu važnost.

Ukoliko ste prikupili informacije iz zemljišnih knjiga i o drugim vrijednim nepokretnostima, prikupljene podatke možete uporediti sa onima koje su zvaničnici naveli u imovinskim obrascima. Tako dokazujete da li su zvaničnici prikrili imovinu.

Primjenom ove metodologije istraživanja novinari CIN-a su otkrili:

- **MELIKA MAHMUTBEGOVIĆ**, zastupnica u Federalnom palamentu, u svom imovinskom kartonu propustila je napisati da, osim dva prijavljena stana u Bugojnu i Sarajevu, u ovim gradovima ima još: dva stana, dva poslovna prostora i tri garaže. Neke od ovih nekretnina dijeli sa sestrama.

- **FAHRUDIN RADONČIĆ**, delegat u Domu naroda Parlamenta BiH, u izjavama o imovinskom stanju prijavio je: zaradu od 570.000 maraka od prodaje udjela u „Avaz-roto pressu“, kuće i 7,8 hektara zemljišta u Vogošći koje je procijenio na 700.000 maraka. Napisao je i da ima stan vrijedan oko 4,2 miliona maraka u crnogorskom Tivtu i zemljište u Plavu koje dijeli sa braćom. Prešutio je da ima jahtu u Baru u Crnoj Gori tržišne vrijednosti oko tri miliona maraka.

Dakle, visokopozicionirani političari kriju svoju imovinu, ignorišući zakon koji ih obavezuje da prijave nadležnim institucijama sve što imaju.

Desiće se da tokom istraživanja niste potvrdili hipotezu koju ste pretpostavili na početku istraživanja i da vam priča „padne“, što je profesionalni rizik na koji morate biti spremni. Međutim, češće se desi da hipotezu jednostavno prilagodite činjenicama do kojih ste došli tokom istraživanja, rukovodeći se dokazima koju su jedini putokaz za pravu istraživačku priču.

Kako bi stalno imao u vidu redoslijed dešavanja te odnose i kontekst u kojima su se događali, istraživački novinar ima na raspolaganju tzv. „timeline“ ili vremensku liniju. Ovo je odličan alat koji nam pomaže da, redanjem svih događaja koje smo utvrdili kao važne u vezi sa sticanjem nekretnina, donosimo važne zaključke o priči.

Ovaj alat je novinarima CIN-a omogućio da uvide važne odnose u primjerima:

► sticanje imovine Dragana Čovića, predsjednika Hrvatske demokratske zajednice BiH

Bračni par Dragan i Bernadica Čović je većinu svojih nekretnina dobio na poklon ili kupio do 2003. godine. Nakon što su otvorene istrage i sudski sporovi protiv Čovića zbog sumnje da je koristio javne funkcije za ličnu korist - situacija se promijenila. U narednim godinama nekretnine je, uglavnom, kupovala Bernadica Čović u ime svoje rodbine, a poslije je neke od tih nekretnina i dobila na poklon.

U sljedećem primjeru možete na vremenskoj liniji vidjeti kako su supružnici Čović postali vlasnici jedne nekretnine iako formalno nisu ulagali u njenu kupovinu. Riječ je o vili koja se prostire na površini pola nogometnog igrališta.

TIMELINE

JANUAR 2005.

Advokatski ured **Bernadice Čović** dobiva punomoć od tetke **Zdravke Čuljak** za kupovinu zemljišta (2396 m²)




FEBRUAR 2005.

Advokatski ured **Bernadice Čović** kupuje zemljište u ime **Zdravke Čuljak** (2396 m²)



MART 2008.

Bernadica Čović dobiva od oca **Blage Prskala** punomoć za kupovinu zemljišta (896 m²)



Istraživačko novinarstvo se najčešće bavi kompleksnim temama koje zadiru u privatne biznise i poslovne odnose pojedinaca pa je posao istraživačkog novinara rijetko kada jednostavan i lagan. Međutim, to je jedini način da se napiše priča koja počiva na dokumentima i koja je svjedočenje o lošim ljudima i njihovim nedjelima, a na koju se mogu osloniti i pravosudni organi koji imaju moć da takvo ponašanje kazne.

Istraživački novinari otkrivaju slabosti društvenih propisa i nedjela koja pojedinci i grupe ljudi čine zahvaljujući tim slabostima, ulažući snagu da ih vješto sakriju od javnosti. Zbog toga istraživački novinari moraju imati znanja i vještine koje inače nisu prijeko potrebne drugim novinarima.

Moraju razumjeti i znati analizirati javne dokumente, pratiti tok novca i u gomili podataka umjeti prepoznati one koji su važni za dokazivanje korupcije i kriminala. Istovremeno, moraju biti pomalo i psiholozi i imati načine da steknu povjerenje i privole ljude različitih karaktera na razgovor i saradnju o osjetljivim i nerijetko opasnim temama.

Istraživačko novinarstvo javnosti nudi istinu na osnovu koje se donose odluke i mijenja svijet. Zato mora počivati na jasno utvrđenoj metodologiji i imati čvrste dokaze kao potporu svojim tezama.

Tokom kontinuiranog iskustva u istraživanju skrivene, neprijavljene ili „nepostojeće“ imovine koju funkcioneri prebacuju na članove porodice ili druge ljude od povjerenja kako bi izbjegli da je prijave ili dokažu njeno porijeklo, novinari Centra za istraživačko novinarstvo (CIN) su dokazali brojne prevare i laži političara i drugih ljudi od interesa u Bosni i Hercegovini.

U ovaj priručnik su prenijeli dio iskustva i način istraživanja imovine političara sa nadom da će njihovo znanje ohrabriti druge kolege da krenu istim koracima.

Tel.: +387 33 560 040

Fax: +387 33 560 045

E-mail: info@cin.ba

Web: www.cin.ba

Gabriele Moreno Locatelli 11

71000 Sarajevo

Bosna i Hercegovina



CENTAR ZA ISTRAŽIVAČKO NOVINARSTVO (CIN)

maj 2021.